

FURÚMIÑETU LIGÁRADAN PÉDRO

Labúrïjan Pédro joun afiñetiña ja chagágubaña bougudi lueí jageíra

¹ Áu Pédro, ában láni Jesucrístu apóstolu áu, nabúrïjañoun gárada to jun, jugúya lánigu Búngiu ja chagágubaña bougudi lueí jageíra louúbawagu Pónto, Galácia, Capadócia, Ásia, lúma Bitínia. ² Nidújeñu, anúadaja láadün Búngiu Úguchili lúmagine meja binárü lun lánigu jumá, áni subúdi lumúti meja luágu lachúlürüba lan ában wéyu lun ítara lúba lan, ladúga ligía lan lugúndaanbei. Ligía larúmadagüdañajañoun lubeí Sífiri Sándu janígi láu líta Jesucrístu, adúgalaün lun gagáambadi jumá. Ibíja jumá lubeíti sarágu abíniruni lúma darángilaü lúmagine Búngiu.

Loúchawagúba jafñen, ábame liábin buíti lídaangiñe

³ Rúwama uweíriguni lun Búngiu, le Lúguchibei Wabúreme Jesucrístu, luágu luweírin lugúdemejabu woun. Rújali iséri ibágari woun queísi lirájüñü láu lásaaragüdüni Crístu lídaangiñe ouweni lúnya labágaridun. ⁴ Queísi lirájüñü wabeí, gayáraati weménigidun le gumúti luágu wabíjubei lan ubuíduni le aráanse lálalibeí wabá, gayáraati weménigidun luágu werésibirubei lan alágan le areídañu lubeí Búngiu wabá, siélu—ában alágan le lúnbei ladúraran lun sun dan, le siñábei ladáseirun, le siñábei leféridiruni lubuídun. ⁵ Goúnigi lumútiwa Búngiu láu lubáfu lugúndun afiñe wamá luágu, lun gayáraabei lan wabíjini asálbaruni lídaangiñe asúfuriruni lánina ubouú le, le aráanseñu lubeí wabá lárigiñeme lagúmuchun ubouú.

⁶ Ligía lébubei buin jíña lan láu ugúndani, láu sun lúnti lán funa jasúfurirun sarágu oúchawagúni luágu murúsun dan. ⁷ Lúnti jasúfuriruni oúchawagúni ladúga ítara líña lan jafíñen quei gólu—lúnti louchúniwa láu wátu geméti lun larijíniwa ca lan luwúyeribei. Affíñeni le awánduti oúchawagúni ligía, buíti sügú láu gólu, lugúndun gagúmuchaditi gólu. Láu lubeíti jawánduni loúchawagún jafíñen, ladímurejaba Jesucrístu buíti juágu dánme le lagíríbudun ubouágun, jibíjuba gíñe uweíríguni lúma in-ébesei lúmagiñe.

⁸ Jínsiñeti Jesucrístu jun láu sun maríjin jumágili lan, áni láu sun maríjin jumágili lan, rújumaali jeménigi luágu, áni gúndaatün láu ában oúnwenbun ugúndani le siña jumuti aríñaga láu dimúrei. ⁹ Ladúga méme luweírín jafíñen luágu Crístu, jerésibiruñein tasálbarun juwáni.

¹⁰ Lídan meja dan le sügújalibei, adímurejatiña meja profétagu luágu cátei le lúnbei líchuguni Búngiu jun láu lareíni, ába jáfaagun lun gunfaráanda jamáni luáguti asálbaruni le, le uágubei ladímureja Sífiri Sándu jádaangiñe.

¹¹ Subúdigüda lumútija láni Crístu Espíritu joun wügúriña jagía le lúnbei lasúfuriruni Crístu lubáramegiwa, lúma uweíríguni le lúnbei liábin lárigiñe. Jagíati, ábaja jóuchun jasúbudiruni cátei lan güriúa ligía, lúma ídaba lan lasúsereda cátei le, le uágubei lariñaga Sífiri Sándu le jádaanbei joun. ¹² Ába lasúbudiragüdüni Búngiu joun luágu mámaba lan lídan jadáni lagúnfulirúa buri cátei le, luágu lídaanba lan wadáani. Asálbaruni lé meja uágubei jadímureja, ligía méme le uágubei japúrichija güriúa jun lídoun buri dan le, láu lubáfu Sífiri Sándu le ñúbinbei siéluigiñe. Ásta ánjeligu, buséntiña jamúga gíñe gunfaráanda jamáni buri cátei le.

Busénti Búngiu lun wabágaridun ában ibágari le jarúmati

¹³ Quei jagúrabajañein lubei jerésibiruni jalágaante siélu, gidájumei samínaü málati jarítangunrugugiñe, lubáragiñe líra, derégüdagulá jarítangun, rújumei sun jeménigi luágu asálbaruni le lúnbei líchuguni Búngiu jun láu lareíni dánme le lagíribudun Jesucrístu ubouágun. ¹⁴ Queísi isáanigu gagáambaditiña, mabágarida jumá quei meja ligáburi jabágaridun lubáragiñe meja jasúbudiruni Búngiu. ¹⁵ Lubáragiñe líra, abágarida jumá ában ibágari jarúmati le gumúti, lugúndun Búngiu le agúarubei jun lun lánigu jumá, jarúmati lídan sun cátei. ¹⁶ Taríñajare Lerérun Búngiu. “Jarúma jumá, lugúndun áu, jarúmatina.”

¹⁷ Queíti janúgüni Búngiu quei Júguchi, Búngiu le ában-bei lábu ligáburi lagúseragüdüni jagáburi sun güriña, lúnti júaradun lúma láu ában gounigi sun dan le lún-bei jabágariduni ya ubouágu. ¹⁸ Sálba láadün Búngiu lídaangiñe lagúbüri ibágari lé meja jafúnrendeirubei já-magiñe binádu jagúbürigu, áni subúdi jumúti buídu luágu máma lan láu cátei gagúmuchaditi lafáyeirúa lebégi asál-baruni le, queísi buri gólu o pláta, ¹⁹ láu líta Crístu le gebégibeí sügú láu sun cátei lafáyeirúa. Derégewati Crístu lun loúnwen luágu wafígoun quei ában mudún le buídubei lídan sun luwúyeri, sálba wamámuga. ²⁰ Lúmagiñe lubáragiñe buga ladúgüni Búngiu ubou, ába laráanserun lun Crístuba lan Wasálbaragüle, luágu lubeíti wafúlei-sein lachúlaagua Crístu lídoun lagúmujoún dan le, lun lasálbaruniwa. ²¹ Lídaangiñe Crístu, ába jiyábin lun jafíñerun luágu Búngiu le ásaaragüdübalin Crístu lídaangiñe ouweni, ru ligá uweíriguni lun, ítara líña jiyábin lun jafíñerun luágu, rújumeíme sun jeménigin luágu.

²² Guetó, láu gagáambadi jumá lun linárün Búngiu

láu lubáfu Sífiri Sándu, jarúmaaru janígi lun gayáraabei lan jínsiñedun jidújeñu lueígiñe Jesucristu jun le tímatimaati. Lúnti lubeíti jínsiñegua jumá júngua láu sun tarúman janígi, lúma láu sun jére, ²³ lugúndun iséri gürígia jugúya. Mámaadün jasáanigu agúbürigu ja gouwedaditiña, lirájüñüjadün Búngiu láu jagáambuni lerérun le íchugubei ibágari, le giñe adúrarubei lun sun dan. ²⁴ Taríñajare Lerérun Búngiu.

Ítara jáña sun gürígia quei jíduru,

liábin jaweírigun quei lufúlurin jíduru.

Dan le lásaurün jíduru, ába láburujan lufúlurin,

²⁵ ánjein Lerérun Búngiu, duráti lun sun dan.

Áni dimúrei le, ligía ugánu le lánina asálbaruni le uágubei laríñawagúa jun.

2

¹ Ligía, queísi lirájüñüjadün lubeí Búngiu, ígira jumeí lubeíti sun luwúyeri wuríbani, sun eyéeni, biángua lan igíbu, gimúgaü, lúma sun luwúyeri marásualugu. ² Ítara quei jabúseeruni irájüñü figígiña míligi jarúmati lun gayáraabei lan jaweínamudun, ítaralá giñe busén jumá lun jatúriajani Lerérun Búngiu buídu lun gayáraabei lan ledérebugudun jaffínen luágu Crístu. ³ Subúdiadün murúsun luáguti luweírin lubuídun louuseruníwa Crístu, lúnti líchugun subúdi ligía ában oúnwenbun ayúmajani jídoun lúntima jasúbudiruni Crístu.

⁴ Ayárafajoúa jumá lubeíti lun Crístu le gabágaribei. Rútiña gürígia mebéreseni luágu, ánjeinti lun Búngiu, ítara líña Crístu quei ában dúbü le gebégiti sarágu, le lanúadirunbei lun ligíaba lan ébuu tun lilígilisin, áni sun ja afiñebaña luágu Crístu, jagía lilígilisinbaña Búngiu.

⁵ Ítara líña lubeíti, ígiraguagüda jumá júngua lun Crístu

le rúlaalíbei ibágari magúmuchaditi jun, lun tadügúniwa ában témpulu buítu lun Búngiu jídaangiñe, lun gíne ítara jumá quei fádirigu ja derégeguatiña jóungua lun Búngiu, ja íchugubalin cátei le áubei lagúndaara lun, lídaangiñe Jesucrístu. ⁶ Ligía gíne taríñagunbei Lerérun Búngiu.

Noúnajañein Crístu lun ligába lan dúbü le weíriguti-maabei tuágu nilígilisin lídan fulásu le gíríbei Sión.

Áni ja affínerutiña luágu, buídubei lídin joun.

⁷ Weírítu lebégi Crístu jun, jugúya le affínebei luágu, án-jeinti joun ja maffínebaña, mebégiti quei dúbü le ún-bei jamájara ábunagutiña. Láu sun líra, gúnfulijali le taríñagubei Lerérun Búngiu.

Dúbü le únbei jamájara ábunagutiña,

núbinja lun ligába lan furúmiñeti lídan bunáguau.

⁸ Joun ja maffínebaña luágu Crístu, gúnfuliti gíne le aríñawagúbei.

Ában dúbü achúgeraguágülei ligía, le eíguadagüdúti gürí-gia.

Ja madúgünbaña gásu láu ugánu lánina asálbaruni lí-daangiñe Crístu, chugéguatiña luágu, fériditiña gíne lun sun dan, queísi laráanseruni Búngiu.

Ja lánigubaña Búngiu

⁹ Ánjeinti jugúya le affínebei luágu Crístu, ában familia anúadajoúatiña jugúya, fádirigu ja esériwidutiña lun urúei le Búngiu, gürígia lánigu Búngiu ja derégeguaaña jóungua lun. Ítara líña cátei le, lun jadímurejan luágu buri cátei buíti le ladúgübei Búngiu, le aságarubalün lídaangiñe lubúriga lun lídoun luweírin larúgounga le líchugubei Búngiu. ¹⁰ Mibíjintün meja ában abúremein lun latoúnigirunün, guetó lánigujadün Búngiu. Úatiña

meja gudémejabutiña jun, ánjein guetó, gudémejabuti Búngiu jun.

Abágarida jumá lun jesériwidun lun Búngiu

¹¹ Nidújeñu jínsiñetiña nun, jugúya queísi teréncha lídan uboú le, aganoútiña bougudi lueí jageíra, ayúmuraguátina jun lun mígiraguagüdün jumá júngua lun lagúbüri buri ayúmajani le ageíndagubei túma juwáni.

¹² Buídulá jouserun jádan ja ibídiñejabubaña lun Búngiu, ítara lúba, láu sun lan adímureja jamá wuríba juágu guetó camá jamuga wuríbatün, jaríjubei buíti le jadúgübei, ábame jíchugun uweíriguni lun Búngiu dánme lachúlürün wéyu lun lagúseragüdün.

¹³ Queísi lánigu jumá Wabúreme Crístu, ayúmuraguatina jun lun úaragua jumá lúma sun gumádi ya uboúagu. Gúnfuli jumá lúma lugúmadin urúei, quei ligía lántima íñubei ufúlasun, ¹⁴ gúnfuli jumá gíñe lúma jagúmadin gumádimatiña ja louñajabaña lun jafáyeiragüdüniña ja múaradúnbaña lúma lúrudu, lúma lun jíchugun uweíriguni joun ja adúgübaña buíti. ¹⁵ Busénti Búngiu lun jadúgüni le buídubei, lun jámanichagüdüniña ja ibídiouguabaña áu, ja busénbaña jadímurejan wuríba juágu.

¹⁶ Queísi lirájüñü jumá Búngiu, ousera jumá queísi gürígia ja mámabaña idámuni lun ni ában gürígia, máma lueígiñe líra lun jadúgüni le wuríbabei, lubáragiñe líra, abágarida jumá queísi lidámun Búngiu. ¹⁷ Inébe jamá sun gürígia jun queísi lubúdubu, jínsiñe jamá jidújeñu lueígiñe Jesucrístu jun, inébelá Búngiu jun, inébelá urúei jun.

Jémpulu luáguti lasúfurirun Crístu

¹⁸ Umúsuniña, inébe jamá jiyúbudirigu jun queísi lubúdubu, mámarügü ja buídubaña júma, ásta gíñe ja wuríbabaña. ¹⁹ Lugúndun labínirubei Búngiu gürígia le awándubei asúfuriruni le mébunati láu larítapun luágu Búngiu. ²⁰ Ánjaün adúga cátei wuríbati, jafáyeira luágu, málati gagúraasun jumá luágu líra, ánjaün asúfurira lueígiñe jadúgün cátei buíti, ába jawánduni láu gurásu, buíti líra ligíbugiñe Búngiu. ²¹ Lun luwúyeri igáburi le lagúara Búngiu juágu, quei sáfuri lubeí Crístu juágu láu gurásu, íchiga ában jémpulu jun lun jafálaruni. ²² Madúgünti Crístu ni ában figoú, meyéerapun ligía gürígia ni ában weíyaasu. ²³ Dan le janábuni, moúnabunti láu anábajani, dan le jasúfuriragüdüni, masádirun lumútiña, lubáragiñe líra, derégeguarügüti lúngua lun Búngiu le agúseragüdübei lau ísuruni. ²⁴ Barú lumuti Crístu guánarügü wafígoun luóguua luágu gurúwa lun weréderun quei jilánu lun figoú, lun wabágaridun ában ibágari le lánina ísuruni. Buleíseiwati lun wareídagun. ²⁵ Ítara jíña meja quei mudún ja féridijaña, ánjein guetó, ñúbinjadün lun Crístu le oúnigirubalün queísi jouniri mudún, toúnigiloún juwáni.

3

Ligáburi jabágaridun maríetiña

¹ Ítara gíñe jugúya wúriña gámaritiña, derégegua jumá júngua joun júmarigu, lun ánjein lan mánjagiña lubeí lun ugánu lánina asálbaruni, gayára lámuga jayábin lun jafíñerun luágu Crístu, maríñagunga jugúya ni cáta joun luágu asálbaruni, ² láurügü jaríjini lubúndun jouseruniña láu inébesei lúma larúman igáburi. ³ Mámalá láu buri cátei bouguditi jibíti jewéndeda, quei buri lanárime aroúraguni, arígeilaü lúma buri bángüli le

gólu, anáanguni wéndegutu, ⁴ tídaanlá janígi jewéndeda, le ábanbei ubuíduni le meféridirawadibei. Ában igáburi bímeti, darángila, ligía cátei gebégibei sarágu ligíbugiñe Búngiu. ⁵ Ítara liñá meja ligáburi jewéndedun wúriña já meja derégeguañabaña jóungua lun Búngiu lídan meja dan le sügújalibei. Jeménigitiña meja luágu Búngiu, derégegua jagía jóungua joun jámarigu. ⁶ Ítara tiñá meja Sára. gagáambaditu lun Abrahám, ába tagúarun lun, “nabúreme” lun tarúfuduni linében tun. Jiyábinba lun ítara jumá quei tugúya ánjein jadúga le buídubei, manúfudeiga lueí ni cáta.

⁷ Jugúya gíñe wügúriña, áfaagua jumá lun gunfaráanda jumániña júmarigu. Rújumei jafúlasun joun, mámarügü lueígiñe mére tántima wúri, lugúndun gíñe rúlaani Búngiu ibágari méme magúmuchaditi le líchugubei jun láu lareíni, joun. Adúga jumeí ítara, úa lámuga ni cáta lun leréderuniin lueí jayúmragun lun Búngiu.

Ja asúfurirubaña lueígiñe jadúgüni le buídubei

⁸ Abágarida jumá sun jugúya lídan úarani lúma láu gudémejabu jídaangua, jínsiñegua jugúyame júngua queísi idújeñu lueígiñe Jesucrístu. Areída jumá, únabu ligíame janáangun júngua. ⁹ Máguyugüda jumá wuríbani luágu wuríbani, ni anabúni luágu anabúni, lubáragiñe líra, ágyuyugüda jumá abíniruni, lugúndun lun jerésibirun abíniruni lúmagiñe Búngiu lagúaraün. Lugúndun taríña-jare Lerérun Búngiu.

¹⁰ Le busénti labágaridun ában ibágari buíti, lúma gíñe ában ibágari lánina ugúndani, lúnti loúnigiruni liyúma lueí ladímurejan wuríbani, maríñagun ligíame iyéeni.

¹¹ Lúnti ladísedun lueí wuríbani lun ladúgüni buíti,

láluajani darángilaü lun labágariduni súnwandan.

¹² Lúnti ítara lan ligáburu, ladúga toúnigi lumútiña Wabúreme Búngiu ja richáguabaña ligíbugiñe, agáambaleí jayúmuragun lun.

Ánjein ja adúgübaña wuríbati, magúndaati Búngiu jáu.

¹³ ¿Cábagi gayára ladúgün wuríbati jun, ánjaün íchaagua júngua lun jadúgüni buíti súnwandan? ¹⁴ Áni íbini jasúfurirun ladúga lísurun jibágari, gúnda jumá ladúga fuleíseiwa jumá lídan le jasúfurirun luágu Crístu. Manúfude jumá lueí ni ában, madíjeri ligáme jarítagun. ¹⁵ Derégeguarügü jumá júngua le gumúti lun Crístu quei Jabúreme, aráanseñu jumá súnwandan lun jóunabuniña ja álügüdütün ca lan ueígiñe jeménigida luágu Crístu, láu maweíriguni lúma láu inébesei. ¹⁶ Buídulá jóuserun, darángilañu támuga janígi, lun ja lan adímurejabaña wuríba luágu lubuídun jigáburu queísi affíñetiña luágu Crístu, nibúsigari jamámuga luágu jerérun guánariügü. ¹⁷ Buítimaati lun jasúfurirun lueígiñe jadúgün buíti, ánjein ítara líña lubeí labúseeruni Búngiu, sügü láu lun jasúfurirun lueígiñe jadúgün wuríbati.

¹⁸ Jarítagua jumá luágu luweírin lasúfurirun Crístu dán meja le loúnwenbei luágu wafígoun ában weíyaasu lun sun dan. Buíti meja Crístu, ába lasúfurirun wawágu, wagía le wuríbabei, lun lanúgüniwa lun Búngiu. Áfarúati jilágubei, wínwantu láni Espíritu. ¹⁹ Quei Espíritu, ñúdünti gíñe apúrichija joun espíritugu ja lídaanbaña jafúlasun jiláaña. ²⁰ Espíritugu jagía, gürígia ja wínwanbaña lídan meja lidáani Noé, magáambaditiña meja gürígia jagía lun Lerérun Búngiu láu sun arúfuda láni Búngiu luweírin lugúraasun joun lídan le lagúrabajani

tagúmuchún árca to ladúgüboun Noé. Mánjatiña jagáambuni Búngiu, ába jasálbarun wídürügü güriáia lídaangiñe luweírin gúnran ligía. ²¹ Dúna ligía, ítara líña quei lidúnarina badísei guetó, le ídaangiñebei wanügúwa lun wasálbarun. Máma lun larúmadun úgubu abásteruni, arúfudarügü lumúti luágu jarúmaaru tan wanígi ligíbugiñe Búngiu láu waffñerun luágu Crístu, luágu gñe sálbaadiwa lan láu lásaarun Crístu lídaangiñe ouweni lúnya labágaridun. ²² Múdeiti Crístu siélun, áni níjein guetó ñun lueígiñe lounwenren Búngiu jáu sun ánjeligu jáma sun jíbiri ubáfu siélu lábugiñe lubáfu.

4

Wesériwidun láu ubáfu le líchugubei Crístu woun

¹ Ligía, ítara quei súfuri lubeí Crístu ya ubouágu wawágu, lúnti gñe aráanseñu wamá lun wasúfurirun láu gurásu luágu. ² Le súfurijalibei luágu Crístu, ígira láali figoú lun labágariduni líbiri libágari queísi lugúndan Búngiu, máma lun líchugun ugúndani lun lagúbüri ayúmajani. ³ Lídan meja dan le sügújalibei, adúga jumúti meja luríban buri cátei le jínsiñebei joun ja ibídiñejabubaña lun Búngiu, jaganouña meja lídan ibágari nibúsigarídünati, gúnfulitün meja luma luríban jayúmajan, abácharuada, adáagua fédu, átagua sarágu, ájuduragua joun sándu, le mouñbei ladügúniwa. Buídurügaali dan le abágarida jumáalibei ítara. ⁴ Guetó, weíriti janígi já meja jumádagubaña láu mafála jumáaña lan lídan lagúbüri ibágari le, ligía jadímurejanbei wuríba juágu. ⁵ Ánjeinti jagía, jagúfesaruba ligíbugiñe Búngiu, le aráanseñubei lun lagúseragüdüniña wínwangiña jáma jiláguaaña, madíse. ⁶ Ligía apúrichijouá lubeí meja luáguti asálbaruni joun ja jiláguañaña guetó, lun gayáraabei lan gabágari tan

jawáni láu libágari Búngiu, láu sun jilá lan jágubu queísi lasúseredun joun sun gürígia.

⁷ Yaráfaali lagúmuchun ubouú, ligía lúnti lubeí aráanseñu jumá, ragúgua jugúyame júngua, derégegua jugúyame júngua lun ayúmuraguni lun Búngiu. ⁸ Louígiñe sun cátei, níjeinlá sarágu ínsiñeni jídan joun jíbirigu, lugúndun ánjaün jínsiñejabu, ferúduna jubeí jafígoun ámu juágu, láu sun gíbe lan. ⁹ Resíbi jumáña gürígia júbiñe láu sun jugúndan. ¹⁰ Rújali Búngiu ában ubáfu lun ságü affíñeti luágu Crístu, ítara liña lubeíti, seríwi jumá joun jíbirigu láu ubáfu le rúlaalíbei Búngiu jun, queísi oúniri buítiña lánina ubáfu buri le líchugubei Búngiu. ¹¹ Le gabáfubei lun lapúrichijan, lúnti ladúgüni queísi ában le adímurejati dimúrei lúmagiñe Búngiu. Le esériwiduti, adúgaleí láu sun érei le líchugubei Búngiu lun. Sun cátei le jadúgübei, adúga jumeí lídan ában igáburi le lúnti líchugúniwa uweírighuni lun Búngiu láu, lídaangiñe Jesucrístu. Búngiu le Súnti Gabáfu, ligía le lúnbei lerésibiruni uweírighuni lun sun dan. Ítaralá.

Wasúfurirun queísi lánigu Crístu

¹² Nidújeñu jínsiñetiña nun, maweíridalá janígi láu buri lidíjери oúchwagúni le jibíjubei, camá jamuga ába cátei ámuti asúseredubei jun. ¹³ Lubáragiñe líra, gúnda jumá luágu gafánran jumá lídan lasúfurirun Crístu, lun gayáraabei lan jabuínchun láu ugúndani dánme le lagíribudun Crístu ubouágun láu sun luweírighun. ¹⁴ Fuleíseiwatün ánjaün anabúa lueígiñe lánigu jumá Crístu, lugúndun arúfuda lumúti líra luágu níjein lan Sífiri Sándu, le weírighubei, jídan. ¹⁵ Ánjein asúfurira ában jídaangiñe, lun máma lan lueígiñe láfarajan, o lueígiñe lan líwerujan, ni lueígiñe ladúraaguni líbiri lúrudu, ni

lueígiñe leméterun lídoun cátei le miábinti lun, mídin. ¹⁶ Ánjeinti asúfurira mútu lueígiñe lánigu lan Crístu, moún lumuti lanúgün busíganu, lúnti líchugun eteín-giruni lun Búngiu luágu lánigu lan Crístu.

¹⁷ Chülújali dan lun lagúmeserun luweírin asúfuriruni, jámagiñe guánarügüba lánigu Búngiu lagúmesera. Ánjeinti lagúmeseruña lubeí asúfuriruni ítara wámagiñe, weíritimaabei jasúfurirun ja mánjabaña jerésibiruni lerérun Búngiu. ¹⁸ Ánjeinti jénreengu lubeí jasálbarun ja buídubaña, ¿cábagi asúsereda joun ja wuríbabaña, jáma ja gafígounbaña? ¹⁹ Ja lubeíti asúfurirubaña queísi labúseeruni Búngiu, lúnti ítara méme jamá adúgei le buídubei, derége jamóunme jawáni lújaburugun Búngiu le adúgübaña, lugúndun gayáraati weménigidun luágu Búngiu lun lagúnfulirun láu lerérun.

5

Lerérun Pédro joun afiñetiña

¹ Níchuguñein nerérun jun, jugúya ja ábutigubaña lídan jadámurin afiñetiña, queísi ábuti lan gíñe áu quei jugúya, áni geféentina gíñe luágu lasúfurirun Crístu, áni gabárabadina gíñe quei jugúya lídan uweíriguni le lúnbei liábin. ² Toúnigi jumáña lirájüñü Búngiu ja lábugiñebaña jaríaajan queísi jóunigiruniña jóuniri mudún mudún. Adúga jumeí láu ugúndani queísi labúseeruni Búngiu, máma ladúga jafósuruña lan, adúga jumeí ladúga busén jumá jesériwidun lun Búngiu, máma ladúga línsiñegu seínsu. ³ Mousera jumá camá jamuga jabúriña ja lábugiñebaña jaríaajan jugúya, jóucharügü jumá lun ában jumá jémpulu buíti joun. ⁴ Ítara lúba, dánmeti le liábin Jesucrístu, le jóuniri mudún le tímatimaati, jibíjuba ában

uweíriguni le weíriguti le ladúraruba lun sun dan, le mítaraanbei quei rídi le láuti ubánaü le gásaürati.

⁵ Jugúya gürígia ñúbürigiña, rúgua jumá júngua lábun jagúmadin weíyaaña mútu. Lúnti jesériwidagun súnqubei jóunigua láu manáanguni únguaü, lugúndun taríñajare Lerérun Búngiu.

Magúndaanti Búngiu jáu ja barúguabaña jóungua, áni íderagua lumútiña ja manáangunbaña jóungua, láu lareíni.

⁶ Rúgua jumá lubeíti júngua únabu lábugiñe lújabu Búngiu le gabáfubei, lun gayára lan líchuguni uweíriguni jun dánme le lachúlürün dan ligía. ⁷ Madíjeri jumá luágu ni cáta, ígira jumeí sun cátei lun Búngiu, lugúndun laríjiña jáu le tímatimaati.

⁸ Agáguduañu jumá, ragúguañu jumá júngua, lugúndun eíbugañajádügü líña Máfia le jágani queísi líñún gáñiti áluaja cába lan lagúnrinchagua. ⁹ Mígiraguagüda jumá júngua lun, derégüdagu jumá lídan jafíñen, subúdiñu jumeí luágu ligía méme lan gíñe jasúfurirubei jidújeñu lueígiñe Crístu lídan sun fulásu. ¹⁰ Lárigiñeme súfurijadün lan luágu murúsun dan, ladúgübadün Búngiu lun úa lan mégeiti luágu lubuídun jigáburi, derégüdagu lídan jafíñen, surúñu, láu ubáfu lun jawánduni sun cátei. Ligía méme Búngiu le íchugubalin sun abíniruni woun, le gíñe agúarubei woun lun gafánran wamá lídan luweírigun le magúmuchadibei, lídan ában lúma Jesucrístu. ¹¹ Ligía le Súnti Gabáfu lun súnwandan. Ítaralá.

Lagúmujoún buri mábugäi

¹² Nounajañoun tiraúraü gárada to jun lúma Silváno, le nanúgübei queísi ában idújei úaraguati, lun níchugun dúgüdaguaü lun jafíñen, geféen áume jun luágu abíniruni

lan le jerésibirubei, larúfuduñsun cátei. Ligía méme Búngiein lan línsiñejabu Búngiu jun le tímatimaati. Madisedagua jumá lueí línsiñejabu Búngiu ligía.

¹³ Mábuga jáña affñetiña ja Babilóniabaña jun, ja gíñe lanúadajabaña Búngiu lun lánigu jamá queísi lanúadajanün. Mábuga líña gíñe Márcos jun, le ítarabei camá jamuga niraú. ¹⁴ Chúgua jumá júngua lídan líri Wabúreme, arúfuda jumámugei luágu lídaañadiwa lan ában wámagua.

Darángila jumá sun jugúya le lánigu Jesucrístu. Ítaralá.

Lerérún Búngiu To Lánina Iséri Darádu New Testament in Garifuna (HO:cab:Garifuna)

copyright © 2012 Wycliffe Bible Translators, Inc.

Language: Garifuna

Translation by: Wycliffe Bible Translators, Inc.

Garifuna [cab], Honduras

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Garifuna

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25
